

Iwwer die Störch

In de vorsch Woch sinn merr mol bei die Störch gefahrn, weil moin Kummbeer Schorsch die mol sehe wollt. Im Flerschmer Blättche war joo vor korrzem su enn Bericht iwwer die ze lese, aach wo merr die finne kann. Also sinn merr meddem Audo de erst nooch Hochem unn donn Richtung Massenem gefahrn. Korz vorm Woigut Schreier unn vumm Lindehof sinn su Mäst ferr die Stromleidunge unn doodruff hawwe Störch ihr Nesder gebaut, drei Stick sinns.

Mir hawwes Audo in enn Feldweesch gestelld unn sinn noh bei die Mäst gelaafe. Isch hadd e Fernglas unn moin Fotoabberat dabei, um genau gugge ze kenne unn e paar Fotos ze mache. Noochdem merr su e Briggelsche enuff gelaafe sinn hott merr gut die Nesder geseh, unn tatsäschlich hott aus jedem Nest enn Storchekobb unn enn rode Schnawwel erausgeguggd.

Noochdem de Schorsch e Weil dorschs Fernglas geguggd hott seeder: Die drei Weibscher sinn omm Briede, die Männscher sinn unnerweeschs unn mache sisch enn scheene Daach.

Isch waaß nitt, ob dess die Weibscher sinn, habb isch gesaad, weil su vill isch waaß, dun bei dene Störch aach die Männscher brüte, die wechsele sisch ab. Wenn der oone uffem Nest sitze dut, flieht der onner fort, um ebbes ze fresse.

Was frissden su enn Storch?, frächt de Schorsch, su vill Frösch hawwe mir doch nimmi in unserne Geeschend?

Enn Storch frisst alles außer Griezeisch, habb isch gesaad, unn dessdeweesche hawwe monsche Jeescher die gar nitt su gern. Wenn de Storch iwwers Feld marschierd unn enn junge Has odder e jung Feldhinkel finne dut frissder die aach. Awwer meisdens frissder Mäus unn Reeschewerrmer, awwer aach Insekte, also alles was su im Feld unn uff de Wisse vor soin Schnawwel kimmt.

Mir hawwe e Zeidlong geguggd, isch habb e paar Fotos gemacht unn donn sinn merr zum Audo unn sinn nooch Hochem in e Wertschaft gefahrn.

Wie merr unser Glas Woi vor uns unn schunn emol enn Schluck gedrunke hadde, seet de Schorsch unn grinst dabei: Werrd eischendlich dene Mädcher unn Buwe heitzaach noch verzählt, dass die Störch die kloone Kinner bringe dun? Unn dass de Storch de Mudder, weil die joo e paar Daach im Bett bleiwe dut, ins Boo gebisse hott?

Naa, saach isch, dess werrd heit bestimmt nimmi verzählt. Zu unserne Zeit hott merr ferr alles, was meddem Kinner mache unn Kinner kriehe ze due hott, nitt die rischdische Werrder gehabbd. Isch moon su klinisch sawere Werrder, die merr aach beim Dokder odder in de Schul verwende kann, weil die dut merr erst in de letzde zwonnsisch John benutze.

No ja, moont de Schorsch, die Kinner hawwe aach heit alle Meeschlichkeide, sisch dess im Internet oozegugge. Die wisse nitt nor ab zeh, zwölf schunn wies gemacht werrd, die hawwes donn villeischd aach schunn sellwer probiert unn donn nitt nor mett oom odder ooner oonsische.

Isch saach: Ja, unn wennses long genuch prowierd hawwe, donn heirate se unn e paar Johr später, wenn e paar Kinner doo sinn, losse se sich widder scheide.

Seet de Schorsch: Dess kimmt villeischd doodefoo, dass die junge Leit nitt onn de Storch, awwer aach nitt doodroo glaawe, dasses außer Sex aach noch su ebbes gibt, was merr Liebe nenne dut.

Eiern Honnes